

四庫全書

子部

欽定四庫全書

子部

宋高僧傳卷十四

五四

詳校官監察御史

臣王爾烈

檢討

臣

何思鈞覆勘

總校官編修臣王燕緒

校對官編修臣馬啟泰

謄錄監生臣胡俊

欽定四庫全書

宋高僧傳卷十四

宋 釋贊寧 撰

明律篇第四之一

正傳二十人
附見五人

唐京兆西明寺道宣傳

大慈

釋道宣姓錢氏丹徒人也一云長城人其先出自廣陵
太守讓之後洎太史令樂之撰天文集占一百卷考諱
申府君陳吏部尚書皆高矩令猷周仁全行盛德百代

君子萬年母娠而夢月貫其懷復夢梵僧語曰汝所姓者即梁朝僧祜律師祜則南齊剡溪隱嶽寺僧護也宜從出家崇樹釋教云凡十二月在胎四月八日降誕九歲能賦十五厭俗誦習諸經依智願律師受業洎十六落髮所謂除結非欲染衣便諒日嚴道場弱冠極力護持專精克念感舍利現於寶函隋大業年中從智晉律師受具武德中依首習律纔聽一徧方議修禪願師呵曰夫適遐自邇因微知章修捨有時功願須滿未宜即

去律也抑令聽二十徧已乃坐山林行定慧晦迹於終
南傲掌之谷所居乏水神人指之穿地尺餘其泉迸涌
時號為白泉寺猛獸馴伏每有所依名華芬芳奇草蔓
延隋末徙崇義精舍載遷豐德寺嘗因獨坐護法神告
曰彼清官村故淨業寺地當寶勢道可習成聞斯卜焉
焚功德香行般舟定時有羣龍禮謁若男若女化為人
形沙彌散心顧盼邪視龍赫然發怒將搏攫之尋追悔
吐毒井中具陳而去宣乃令封閉人或潛開往往煙上

審其神變或送異華一奩形似棗華大如榆莢香氣馥
醇數載宛然又供奇果季孟梨柰然其味甘其色潔非
人間所遇也門徒嘗欲舉陰事先是潛通以定觀根隨
病與藥皆此類者有處士孫思邈嘗隱終南山與宣相
接結林下之交每一往來議論終夕時天旱有西域僧
於昆明池結壇祈雨詔有司備香燈供具凡七日池水
日漲數尺有老人夜詣宣求救頗形倉卒之狀曰弟子
即昆明池龍也時之無雨乃天意也非由弟子今胡僧

取利於弟子而欺天子言祈雨命在旦夕乞和尚法力
加護宣曰吾無能救爾爾可急求孫先生老人至思邈
石室冤訴再三云宣律師示我故敢相投也邈曰我知
昆明池龍宮有仙方三十首能示余余乃救爾老人曰
此方上界不許輒傳今事急矣固何所恪少選捧方而
至邈曰爾速還無懼胡僧也自是池水大漲數日溢岸
胡僧術將盡矣無能為也及西明寺初就詔宣充上座
三歲獎師至止詔與翻譯又送真身往扶風無憂王寺

遇勅令僧拜等上啟朝宰護法又如此者撰法門文記
廣弘明集續高僧傳三寶錄羯磨戒疏行事鈔義鈔等
二百二十餘卷三衣皆紵一食唯菽行則杖策坐不倚
牀蚤蝨從遊居然除受土木自得固已亡身嘗築一壇
俄有長眉僧談道知者其實賓頭盧也復三果梵僧禮
壇讚曰自佛滅後像法住世興發毘尼唯師一人也乾
封二年春冥感天人來談律相言鈔文輕重儀中外悞
皆譯之過非師之咎請師改正故今所行著述多是重

修本是也。又有天人云：曾換祇洹圖經計人間紙帛一百許卷，宣苦告口占一一抄記，上下二卷又口傳偈頌號付囑儀十卷是也。貞觀中，曾隱沁部雲室，山人睹天童給侍左右於西明寺，夜行道足跌前階，有物扶持，履空無害，熟顧視之，乃少年也。宣遽問何人，中夜在此，少年曰：某非常人，即毘沙門天王之子那吒也。護法之故，擁護和尚時之久矣。宣曰：貧道修行無事煩，太子太子威神自在，西域有可作佛事者，願為致之。太子曰：某有

佛牙寶掌雖久頭目猶捨敢不奉獻俄授於宣宣保錄
供養焉復次庭除有一天人來禮謁謂宣曰律師當生覩
史天宮持物一苞云是棘林香爾後十旬安坐而化則
乾封二年十月三日也春秋七十二僧臘五十二累門
人窆于壇谷石室其後樹塔三所高宗下詔令崇飾圖
寫宣之真相匠韓伯通塑續之蓋追仰道風也宣從登
戒壇及當泥曰其間受法傳教弟子可千百人其親度
曰大慈律師授法者文綱等其天人付授佛牙密令文

綱掌護持去崇聖寺東塔大和初丞相韋公處厚建塔
於西廊焉宣之持律聲振竺乾宣之編修美流天下是
故無畏三藏到東夏朝謁帝問自遠而來得無勞乎欲
於何方休息三藏奏曰在天竺時常聞西明寺宣律師
秉持第一願往依止焉勅允之宣持禁堅牢捫蝨以繇
紙裹投於地三藏曰撲有情於地之聲也凡諸密行或
制或遮良可知矣至代宗大厯二年勅此寺三綱如聞
彼寺有大德道宣律師授得釋迦佛牙及肉舍利宜

即詣右銀臺門進來朕要觀禮至十一年十月勅每年
內中出香一合送西明寺故道宣律師堂為國焚之禱
祝至懿宗咸通十年左右街僧令霄玄暢等上表乞追
贈其年十月勅謚曰澄照塔曰淨光先所居久在終南
故號南山律宗焉天寶元載靈昌太守李邕會昌元年
工部郎中嚴厚本各為碑頌德云

系曰律宗犯即問心心有虛實故如未得道起覆想說
則宜犯重矣若實有天龍來至我所而云犯重招謗還

婆羅漢同也宣屢屢有天之使者或送佛牙或充給使
非宣自述也如遣龍去孫先生所豈自言邪至於乾封
之際天神合沓或寫祇洹圖經付囑儀等且非寓言於
鬼物乎君不見十誦律中諸比丘尚揚言目連犯妄佛
言目連隨心想說無罪佛世猶爾像季嫉賢斯何足怪
也又無畏非開元中者貞觀顯慶已來莫別有無畏否
唐京兆恒濟寺道成傳

釋道成者不知何許人也居於天邑演彼律乘戒月揚

光圓而不缺德瓶告實滿而不傾當顯慶中數四分之一
宗有同霧市時文綱律匠雖先依澄照大師後習律文
乃登成之堂奧矣又懷素著述皆出其門垂拱中日照
三藏譯顯識等經天后詔名德十員助其法化成與明
恂嘉尚同預證義由是聲飛神甸位首方壇謂之梧桐
多棲鳳鳥謂之芳沚頗秀蘭叢門生孔多無過此集然
不詳終所

系曰成公與隋蔣州道成同號而異實二者奚先通曰

隋成也精乎十誦著述尤多唐成也傳乎四分譯講偈
妙然其撰集則開悟迷淪究其翻傳則陶甄教道譬猶
後燄靡及乎前光似寶或慙乎真寶互有長短用則無
遺也

唐京師崇聖寺文綱傳

名恪

釋文綱姓孔氏會稽人也曾祖範陳都官尚書祖禩祠
部侍郎考頂生逃海避隋擇木歸舜貞觀始拜尚乘直
長咸光復儒業旁通釋教是故綱也植宿根從習氣慈

母懷孕雜食棄捐有婆羅門僧頭陀語其母曰若此男
終紹三寶自爾每聞空中多異香雜仙樂及誕育之日
白鶴翔集若臨視焉比襁褓中午後不受乳哺猶堅持
齋者童胤隨師訪道十二出家冠年受具精慮苦行專
念息心藜羹糗糧麻衣草薦操有鼻檢口無溢言尋詣
京兆沙門道成律師稟毘尼藏二十五講律三十登壇
每勤修深思凝視反聽淨如止水巖若斷山或風雨宴
居或晝夜獨得故能吉祥在手不捨其瓶威德迎風不

絕於氣出籠瘠鴈坐致虛空起屋下層自然成就唯甘露之滯口喻利劍之傷人慎之重之廣矣至矣由是八方來學四分永流請益者舉袂雲臨讚歎者發聲雷駭久視中天作淫雨人有憂色綱愍之乃端坐思惟却倚屋壁奄至中夕欵爾半頃唯餘背間嶷然山立識者以為得神通因定力故日月靈跡幽明潛感兆於集事應乎遣言左右怪之綱曰夫真實無相塵色本空正覺圓常大悲湛定不可取也是以一時法主四朝帝師同迦

葉之入城遇匿王之說戒竹園門外別有沙彌畢樹枝
間廣聞鷄鳥所以受潤者博入見者深萬病已痊獲歡
喜之藥一心不染解煩惱之繩又恭承絲綸京都翻譯
追論惠用遠契如因翹誠滿朝檀施敵國但依布薩盡
用莊嚴累厯伽藍二十餘所凡是塔廟各已華豐猶且
刺血書經向六百卷登壇受具僅數千人至苦至勤納
無我之海不寢不食種無生之田長安四年奉勅往岐
州無憂王寺迎舍利景龍二載中宗孝和皇帝延入內

道場行道送真身舍利往無憂王寺入塔其年於乾陵
宮為內尼受戒復於宮中坐夏為二聖內尼講四分律
一徧中宗嘉尚為度弟子賜什物絲帛三千匹因奏道
場靈感之事六月七日御札題榜為靈感寺是也諸寺
辟碩德以隸焉夫其左藥宿右上林南臺終山北池渭
水千門宮闕化出雲霄萬乘旌旗天迴原隰先天載睿
宗聖真皇帝又於別殿請為菩薩戒師妃主環階侍從
羅拜兜率天上親聽法言王舍城中普聞淨戒恩旨賜

絹三千餘匹綱悉付常住隨事修營或金地繚垣用增
上價或寶坊飛閣克壯全模或講堂經樓舍利淨土或
軒廊器物厨庫園林皆信施法財周給僧寶方將示迷
津引覺路濯熱火宅拯溺毒流而乃奄忽神遷斯須薪
盡雖有應化何其速歟以開元十五年八月十五日怡
然長往時春秋九十有二其年九月四日塔於寺側焉
聞哀奔喪執紼會墓香華幢蓋緇素華夷填城塞川簞
雲翳景蓋數萬人有若法侶京兆懷素滿意承禮襄陽

崇拔扶風鳳林江陵恒景淄川名恪等百餘人咸曰智
河舟遷法宇棟橈而已哉有若弟子淮南道岸蜀川神
積岐隴慧顓京兆神慧思義紹覺律藏恒暹崇業等五
十餘人竝目以慈眼入於度門金棺不追灰骨罔答乃
請滑臺太守李邕為碑邕象彼馬遷法其班氏以二人
而同傳必百行以齊肩不忝懷素前不慙宣師後李北
海題品不其躋乎有淄州名恪律師者精執律範切勤
求解嘗廁宣師法筵躬問鈔序義宣師親錄隨喜靈感

壇班名於經末又附麗文綱之門也

唐京師恒濟寺懷素傳

賓律師

釋懷素姓范氏其先南陽人也曾祖嶽高宗朝選調為絳州曲沃縣丞祖徽延州廣武縣令父強左武衛長史乃為京兆人也母李氏夢雲雷震駭因而娠焉誕育之辰神光滿室見者求占此子貴極當為王者之師傳也幼齡聰黠器度寬然識者曰學必成功才當逸格耳聞口誦皆謂老成年及十歲忽發出家之意猛利之性二

親難沮貞觀十九年玄奘三歲方西域迴誓求為師雲
與龍而同物星將月以共光俱懸釋氏之天悉麗著明
之象初尋經論不費光陰受具已來專攻律部有鄴郡
法礪律師一方名器五律宗師迷方皆俟其指南得路
咸推其鄉導著疏十卷別是命家見接素公知成律匠
研習三載乃見諸瑕喟然歎曰古人義章未能盡善咸
亨元年發起勇心別述開四分律記至上元三年丙子
歸京奉詔住西太原寺傍聽道成律師講不輟緝綴永

淳元年十軸畢功一家新立彈糾古疏十有六失焉新
義半千百條也傳翼之彪搏攫而有知皆畏乘風之震
砰輶而無遠不聞所化翕然所傳多矣復著俱舍論疏
一十五卷遺教經疏二卷鈔三卷新疏拾遺鈔二十卷
四分僧尼羯磨文兩卷四分僧尼戒本各一卷日誦金
剛經三十卷講大律已疏計五十餘徧其餘書經畫像
不可勝數於本寺別院忽示疾力且恭然告秀章曰余
律行多缺一報將終時空中有天樂瀏亮奄然而逝俗

齡七十四法臘五十三莖日有鴻鶴遠塔悲鳴至暮方
散素所撰述宗薩婆多何邪以法密部緣化地部出化
地從有部生故出受體以無表色也又斥二宗云相部
無知則大開量中得自取大小行也南山犯重則與天
神言論是自言得上人法也大抵素疏出謂之新章焉
開元中嵩山賓律師造飾宗記以解釋之對礪舊疏也
又謂為東西塔律宗因傳習處為名耳大厯中相國元
公載奏成都寶園寺置戒壇傳新疏以俸錢寫疏四十

本法華經疏三十本委寶園光翌傳行之後元公命如
淨公為素作傳韋南康皋作靈壇傳授毘尼新疏記有
承襲者刊名于石其辭首麗其翰兼美為蜀中口實焉
唐光州道岸傳

釋道岸姓唐氏世居潁川是為大族漢尚書令琳司空
珍吳尚書僕射固雍州刺史彬涼鎮北將軍瑤之後也
永嘉南度遷於光州衣冠人物暉映今古岸生而不羣
少而奇槩爰在髫髻有若老成齒冑膠庠徇齊墳典猶

恐聞見未博藝業有遺遂浮江淮達洙泗探禹穴升孔
堂多歷年所矣操翰林之鼓吹游學海之波瀾討論百
家商榷三教乃歎曰學古入官紆金拾紫儒教也餐松
餌栢駕鶴乘龍道教也不出輪迴之中俱非棧喻之義
豈若三乘妙旨六度宏功鎔鍊世間掌握沙界哉遂落
髮出家洗心訪道一音克舉四句精通堅修律儀深入
禪慧夜夢迦葉來為導師朝閱真經究契冥牒由是聲
名籍甚遠近吹噓為出世之津梁固經行之領袖十方

龍象罔不師範焉萬國鵜鷺無敢訓對者向若迴茲妙
識適彼殊途議才必總於四科濟世雅符於三傑有若
越中初法師者秘藏精微罔不明練道高寰宇德重丘
山岸聞善若驚同聲相應乘杯去楚杖錫遊吳雲霧一
披鐘鼓齊振期牙合契澄什聯芳由是常居會稽龍興
寺焉揚越黎庶江淮釋子輻輳烏合巷少居人罕登元
禮之門且覩公超之市岸身遺纏蓋心等虛空不擇賢
愚無論貴賤溫顏接待善誘克勤明鑑莫疲洪鐘必應

皆窺天挹海虛往實歸其利博哉無得稱也時號為大和尚登無畏座講水又律容止端嚴辭辯清暢連環水釋理窟毫分瞻仰者皆悉由衷聽受者得未曾有於是高僧大士心醉神傾捐棄舊聞佩服新義江介一變其道大行孝和皇帝精貫白業遊藝玄樞聞而異焉遣使徵召前後數介然始入朝與大德數人同居內殿帝因朝服躬閱清言雖天睠屢迴而聖威難犯凡厥目對靡不魂驚皆向日趨風減聽收視岸人望雖重僧臘未高

猶淪居下筵累隔先輩惜帝有輪王之位不起承迎以
吾為舍那之後晏然方坐皇帝覩其高尚伏以尊嚴偏
賜衣鉢特彰榮寵因請如來法味屈為菩薩戒師親率
六宮圍繞供養仍圖畫於林光宮御製畫讚辭曰戒珠
皎潔慧流清淨身局五篇心融八定學綜真典觀通實
性維持法務綱統僧政律藏莫分傳芳象教因乎光盛
比夫靈臺影像麟閣丹青功德義殊師臣禮異銓擇網
管統帥僧徒者有司之任也以岸盛德廣大至行高邈

思徧雨露特變章程所歷都白馬中興莊嚴薦福罔極
等寺綱維總務皆承勅命深契物心天下以為榮古今
所未有中宗有懷罔極追福因心先於長安造薦福寺
事不時就作者煩勞勅岸與工部尚書張錫同典其任
廣開方便博施慈悲人或子來役無留務費約功倍帝
甚嘉之頓邀賞錫何間昏曉既荷天澤言酬恩地遂還
光州度人置寺於是祇陀苑囿鬱起僧坊拘隣比丘便
為人寶能事斯畢夫何恨哉江海一辭星霜二紀每懷

成道之所更迫鐘漏之期遂去上京還至本處將申顧
命精擇門人僧行超立儼者是稱上足也克傳珠髻之
寶俾賜金口之言右脇而卧示其泡幻也以開元五年
歲次丁巳八月十日滅度於會稽龍興道場時年六十
有四海竭何依山崩安仰天人感慟道俗哀號執紼衣
纓動盈萬計弟子龍興寺慧武寺主義海都維那道融
大禹寺懷則大善寺道超齊明寺思一雲明寺慧周洪
邑寺懷瑩香嚴寺懷彥平原寺道綱湖州大雲寺子瑀

興國寺慧纂等秀稟珪璋器承磨琢荷導蒙之力懷枯
羽之恩思播芳塵必題貞石乃請禮部侍郎姚奕為碑
紀德初岸本文綱律師高足也及孝和所重其道克昌
以江表多行十誦律東南僧堅執罔知四分岸請帝墨
勅執行南山律宗伊宗盛于江淮間者岸之力也

唐百濟國金山寺真表傳

釋真表者百濟人也家在金山世為弋獵表多躡捷弓
矢最便當開元中逐獸之餘憩於田畝間折柳條貫蝦

蟞成弗置於水中擬為食調遂入山網捕因逐鹿由山
北路歸家全忘取貫蟞歟至明年春獵次聞蟞鳴就水
見去載所貫三十許蝦蟞猶活表於時歎惋自責曰苦
哉何為口腹令彼經年受苦乃絕柳條徐輕放縱因發
意出家自思惟曰我若堂下辭親室中割愛難離慾海
莫揭愚籠由是逃入深山以刀截髮苦到懺悔舉身撲
地志求戒法誓願要期彌勒菩薩授我戒法也夜倍日
功遶旋叩搥心心無間念念翹勤經於七宵詰旦見地

藏菩薩手搖金錫為表策發教發戒緣作受前方便感
斯瑞應歡喜徧身勇猛過前二七日滿有大鬼現可怖
相而推表墜於巖下身無所傷匍匐就登石壇上加復
魔相未休百端千緒至第三七日質明有吉祥鳥鳴曰
菩薩來也乃見白雲若浸粉然更無高下山川平滿成
銀色世界兜率天主逶迤自在儀衛陸離圍遶石壇香
風華雨且非凡世之景物焉爾時慈氏徐步而行至於
壇所垂手摩表頂曰善哉大丈夫求戒如是至於再至

於三蘇迷盧可手攘而却爾心終不退乃為授法表身
心和悅猶如三禪意識與樂根相應也四萬二千福河
常流一切功德尋發天眼焉慈氏躬授三法衣瓦鉢復
賜名曰真表又於膝下出二物非牙非玉乃籤檢之制
也一題曰九者一題曰八者各二字付度表云若人求
戒當先悔罪罪福則持犯性也更加一百八籤籤上署
百八煩惱名目如來戒人或九十日或四十日或三七
日行懺苦到精進期滿限終將九八二籤叅合百八者

佛前望空而擲其籤墮地以驗罪滅不滅之相若百八籤飛逗四畔唯八九二籤卓然壇心而立者即得上上品戒焉若衆籤雖遠或一二來觸九八籤拈觀是何煩惱名抑令前人重覆懺悔已正將重悔煩惱籤和九八者擲其煩惱籤去者名中品戒焉若衆籤埋覆九八者則罪不滅不得戒也設加懺悔過九十日得下品戒焉慈氏重告誨云八者新熏也九者本有焉囑累已天仗既迴山川雲霧於是持天衣執天鉢猶如五夏比丘徇

道下山草木為其低垂覆路殊無溪谷高下之別飛禽
鷲獸馴伏步前又聞空中唱告村落聚邑言菩薩出山
來何不迎接時則人民男女布髮掩泥者脫衣覆路者
檀鬪氎承足者華綈美褥填坑者表咸曲副人情一
一迪踐有女子提半端白氎覆於途中表似驚忙之色
迴避別行女子怪其不平等表曰吾非無慈不均也適
觀氎縷間皆是狝子吾慮傷生避其悞犯耳原其女子
本屠家販買得此布也自爾常有二虎左右隨行表語

之曰吾不入郭郭汝可導引至可修行處則乃緩步而行三十來里就一山坡蹲踞於前時則挂錫樹枝數草端坐四望信士不勸自來同造伽藍號金山寺焉後人求戒年年懺罪者絕多今影堂中道具存焉

系曰表公革心變行一日千里果得慈氏為授戒法此五十受中何受邪通曰近上法見諦自誓也發天眼通是證初二果也非諦理現觀而何專據石壇與多子塔前自誓同也或曰所授籤檢以驗罪滅之相諸聖教無

文莫同諸天傳授或魔鬼所為不可為後法乎通曰若彰善癉惡利益不殊彌勒天主是天傳授非魔必矣諸聖教中有懺罪求徵祥證其罪滅不滅然其佛滅度彌勒降閻浮說瑜伽豈可不為後世法耶十誦律云雖非佛制諸方為清淨者不得不行也

唐安州十力寺秀律師傳

釋秀公者齊安人也髫年天然有離俗之意焉既丁荼蓼便往蜀郡禮興律師諷誦經典易若溫尋又依之進

具果通達毘尼乃為興公傳律上足弟子歟如是四載
入長安造宣律師門為依止之客勤以忘勞涉十六年
不離函丈窮幽諸部陶練數家將首疏為宗本然向黃
州報所生地次往安陸大揚講訓聲美所聞諸王牧守
攸共遵承正化緇徒咸摹細行有貞固律師居於上席
解冠諸生最顯清名餘皆後殿其諸成業不可勝算春
秋七十餘卒於十力寺本房焉

唐京師崇聖寺靈粵傳

釋靈峒者不知何許人也勤乎切問靡憚尋師乾封中
於西明寺躬預南山宣師法席然其不拘常所或近文
網或親大慈皆求益也末塗懼失宣意隨講收采所聞
號之曰記以解刪補鈔也若然者推究造義章之始唯
慈與峒也又別撰輕重訣故苑陵玄冑親覩其文故援
引之以解量處輕重儀馬金革之故其訣湮滅無復可
尋矣

唐京兆崇福寺滿意傳

釋滿意不知何許人也風神峭拔識量寬和經論旁通
專於律學武德末所遇鄴都法礪律師作疏解曇無德
律遂往摠衣明其授受如是講導三十許年乃傳付觀
音寺大亮律師亮方授越州曇一盛化之間出龍象之
資無過意之門也矣

唐京兆西明寺崇業傳

釋崇業不知何許人也初同弋陽道岸學毗尼於文綱
之法集業之服勤淬礪罔怠黷肆之間推居元長與淄

州名恪齊名挺拔剛毅過之美聲洋洋達於禁闥睿宗
聖真皇帝操心履道勅以舊邸造安國寺有詔業入承
明熏修別殿爲帝授菩薩戒施物優渥僉迴捨修菩提
寺殿宇抑由先不畜盈長之故也開元中微疾囑弟子
曰吾化窮數盡汝曹堅以防川無令放逸語訖終於所
居寺之別院業即南山之嗣孫矣

唐越州法華山寺玄儼傳

融濟

釋玄儼俗姓徐氏晉室南遷因官諸暨遂爲縣族年始

十二辭親從師事富春僧暉證聖元年恩制度人始墮
僧數隸懸溜寺儼幼而明敏長則韶令標格峻整風儀
凜然迨於弱冠乃從光州岸師諮受具戒後乃遊詣上
京探賸律範遇崇福意律師并融濟律師皆名匠一方
南山上足咸能昇堂睹奧共所印可由是道尊戒潔名
動京師安國授記並充大德後還江左偏行四分因著
輔篇記十卷羯磨述章三篇至今僧徒遠近傳寫初光
州岸公嘗因假寐忽夢神僧謂曰玄儼當為法器云何

教以小乘後乃命宣般若由是研精覃思採摭舊學撰
金剛義疏七卷古德所不解先達所未詳我則發揮光
明若指諸掌誓以一生宣講百徧越邑精舍時稱法華
晉沙門曇翼曾結菴山巔入是法三昧感徧吉菩薩徒
觀其塔類多寶涌出以證經宮如轉輪飛行而聽法雙
鳥所以示兆今尚翔鳴六象所以呈奇時猶隱現不可
得而思議者蓋斯之謂歟信如來之福庭是菩薩之隱
岳儼乃考盤是卜東鉢深棲建置戒壇招集律行若夫

秦衡上士燕代高僧數若稻麻算同竹葦伏膺請益躡
屨擔簦宴坐不出幾三十載開元二十四年帝親注金
剛般若經詔頒天下普令宣講都督河南元彥沖躬請
儼重光聖日遂闡揚幽贊允合天心令盲者見日月之
光聾者聞雷霆之響儼之演暢益有力焉夫樂小法者
迷自我而為病通大方者懜開空之法道若夫會三歸
一觸理冥事自優波離已下猶或病諸而儼綱紀小乘
演暢大法晤佛境之非有識魔界之為空故能使涅槃

將生死一如煩惱與菩提齊致發心而登佛地非我而誰白黑歸依當仁不讓昔僧護法師常居石城宴坐青壁仰其中峰如有佛像願造十丈以圖兜率良願未諧護公長逝梁武帝詔僧祐律師馳傳經理規模刻劃意匠纔施俄而山塚峯崩全身坐現合高百餘尺雖金石絲竹四天之供施常聞功德莊嚴十地之瑠鐫尚闕儼乃內傾衣鉢外率檀那布以黃金之色鎔以白銀之相銅錫鈆錯球琳琅玕七寶由是渾成八珍於焉具足

雖寶積獻蓋界現三千迦葉貢衣金踰十萬如須彌之
現於大海若杲日之出於高山此又儼之功德不可思
議者也故洛州刺史徐嶠工部尚書徐安貞咸以宗室
設道友之禮國子司業康希銑太子賓客賀知章朝散
大夫杭州臨安縣令朱元春亦以鄉曲具法朋之契開
元二十六載恩制度人採訪使潤州刺史齊澣越州都
督景誠採訪盧見義泗州刺史王弼無不停旗淨境稟
承法訓齊公乃方舟結乘奉迎儼於丹陽餘杭吳興諸

郡令新度釋子躬授具戒自廣陵迄於信安地方千里
道俗受法者殆出萬人凡禮佛名經一百徧設無遮大
會十筵而入境住持舉無與比夫秉法傳授從佛口生
有門人法華曇俊崇默龍興崇一開元智符稱心崇義
香嚴懷節寶林洪需覺引灌頂皆不傾油鉢無漏浮囊
經不云乎如旃檀林旃檀園遠如師子王師子園遠信
儼之威神有在而法主之功德不刊將知三界無安百
靈共盡此生已適於後息他世應見於前心以天寶元

載歲次壬午緣化已畢十一月三日現疾於繩牀七日
午時坐終於戒壇院春秋六十有八粵其月二十五日
寔於寺南秦山之下高樹雙塔光明踰於白雲列植千
松秀色羅於明月經始則神邕崇曉住持則唯湛道昭
並躬護聖場親傳智印其餘三千門人五百弟子承般
若之深法受毘尼之密行盡號顓門無待彌勒天寶十
五載歲次景申萬齊融述頌德碑焉

唐杭州靈智寺德秀傳

釋德秀俗姓孫氏富陽人也少出塵區早棲梵宇當圓
戒檢正護浮囊匪定常師留神律府講談之外嘗哀鬼
神乏食恒以深更施其飲食浙汭之民傾誠畏服及終
於定山頗多靈異則天寶初載也遷神座入塔時天降
舍利七顆門人以瓶盛之緘于其塔或發之見秀齒上
生舍利紛紛而墜後人還累甃成浮圖鄉人云恒有白
蛇蟠屈守塔樵牧之童無敢近者

唐開業寺愛同傳

玄通

釋愛同俗姓趙氏本天水人也代襲冠冕弱齡挺拔惠然肯來為佛家子具戒後講彌沙塞律遠近師稟若鱗羽宗乎鯤鳳也昔南宋朝罽賓三藏覺壽譯成此律因出羯磨一卷時運遷移其本零落尋求不獲學者無依同遂於大律之內抄出羯磨一卷彼宗學者盛傳流布被事方全孝和之世神龍中盛重翻宣同與文綱等叅預譯場推為證義義淨所出之經同有力焉著五分律疏十卷復遺囑西明寺玄通律師重施潤色後安史倣

擾焚燎喪寺今無類矣

唐五臺山詮律師傳

釋詮律師者五臺縣人也。綵服出家，冠年受戒。儀則清雅，衆稟綱繩。習毘尼宗，秘菩薩行。詮除訓徒外，守默無撓。遠近有事靡不豫知，人謂為得他心通也。一食終日，敝衣遮體，不貯顆粒。房無縷綜，其強本節用造次不可及也。入滅之日，祥雲鬱密，天樂錚鏦，闔寺僧徒皆聞異香。齎馥乃召集寺衆，執手告辭，囑累門人加趺而滅云。

唐揚州龍興寺法慎傳

釋法慎姓郭氏江都人也孩抱之歲誓齒空門親愛所鍾志不可奪從瑤臺成律師受具戒依太原寺東塔體解律文絕其所疑時賢推服或一言曲分於象表精理自得於環中聲振京師如晞愛日諸寺衆請綱領乃默然而東歸既還揚都俯允羣願恒誦金剛般若經如意輪般若佛心我得此心衆生亦得如意勝願我如此願衆生亦如謂天台止觀包一切經義東山法門是一切

佛乘色空兩亡定慧雙照不可得而稱也慎暑不攝齊
食不求飽居不易坐四方捨施歸於大衆一身有無均
於最下朝廷之士銜命往還路出維揚終歲百數不踐
門闕以為大羞仰承一盼如洗飢渴慎與人子言依於
孝與人臣言依於忠與人上言依於仁與人下言依於
禮佛教儒行合而為一學者流誤故親校經論延來者
聽受故大起僧坊將警羣迷故廣圖菩薩因地善護諸
命故曲濟衆生壽量以文字度人故工於翰墨以法皆

佛法故兼采儒流以我慢為防故自負衣鉢以規規為
任故綱正緇林以發揮道宗故上行恭禮以感慕遺跡
故不遠他邦以龍象叅議故再至京國以軌度端明故
研精律部歟黃門侍郎盧藏用才高名重罕於推挹一
見于慎慕味循環不能離坐退而歎曰宇宙之內信有
高人黃門於院中置以經藏嚴以香燈天地無疆像法
常在太子少保陸象先兵部尚書畢構少府監陸餘慶
吏部侍郎嚴挺之河南尹崔希逸太尉房琯中書侍郎

平章事崔渙禮部尚書李愷辭人王昌齡著作郎綦毋潛僉所瞻奉願同灑掃感動朝宰如此以天寶七載十月十四日晨興盥漱就胡牀加趺心奉西方既曛而滅於龍興寺別院春秋八十三夏六十二緇素弟子北距泗沂南踰嶺徼望哭者千族會葬者萬人其上首曰會稽曇一閩僧懷一南康崇叡晉陵義宣錢塘譚山寺惠鸞洛京法瑜崇元鶴林寺法勵法海維揚惠凝明幽靈祐靈一等罔不成樂說辯才入法華三昧衆所知識物

之依怙天上甘露正味調柔人中象王利根成熟音樂
樹下長流福慧之泉雪山峰頂仰見清涼之月金剛決
定煩惱無餘優曇開敷香潔盈滿法施之恩羣居之感
哀奉色身經始靈塔於蕪城西蜀岡之原像教也幽公
自幼及衰恒所親侍後請吏部員外郎趙郡李華為碑
紀述大厯八年癸丑十二月也大理司直張從申書趙
郡李陽水題額其塔亦幽公經度建塔之地廣袤如素
高卑得中周臨四衢平視千里門人環蔭列栢薦以名

香其塔屬會昌中例皆毀焉

唐杭州華嚴寺道光傳

釋道光姓褚氏踰毘出家方冠受具詣光州和尚學通
毘尼於時夏淺德崇壇場屬望蓋天賚真士為東南義
虎雲雨慈味笙鏞道聲光持法華經創塔廟洎沒身不
怠也上元元年庚子仲秋示疾終於本寺春秋七十九
法臘五十八是日馳陽昧昧淫雨淅淅烈風崇朝嘉木
為折乃東土福盡之徵也俄然喜氣五色亭亭如蓋移

晷不散偏映精廬即西方往生之意也初光未歿其月
三日質明支疾凝神依色身觀彌陀具相現在其前滿
庭碧華昔所未覩者四日昧爽有異人請光為和尚遂
開目彈指曰但發菩提心至五日曼陀羅華自天而雨
門人神烈義津追慕弗遑各分法味流布行化香火無
窮云

唐揚州大雲寺鑒真傳

釋鑒真姓淳于氏廣陵江陽縣人也總州俊明器度宏

博能典謁矣隨父入大雲寺見佛像感動夙心因白父
求出家父奇其志許焉登便就智滿禪師循其獎訓屬
天后長安元年詔於天下度僧乃為息慈配住本寺後
改為龍興迨中宗孝和帝神龍元年從道岸律師受菩
薩戒景龍元年詣長安至二年三月二十八日於實際
寺依荊州恒景律師邊得戒雖新發意有老成風觀光
兩京名師陶誘三藏教法數稔該通動必研幾曾無矜
伐言旋淮海以戒律化誘鬱為一方宗首冰池印月適

足清明貌座揚音良多響答時日本國有沙門榮叡普
照等東來募法用補缺然於開元年中達于揚州爰來
請問禮真足曰我國在海之中不知距齊州幾千萬里
雖有法而無傳法人譬猶終夜有求於幽室非燭何見
乎願師可能輟此方之利樂為海東之導師乎真觀其
所以察其翹勤乃問之曰昔聞南岳思禪師生彼為國
王興隆佛法是乎又聞彼國長屋曾造千袈裟來施中
華名德復於衣緣繡偈云山川異域風月同天寄諸佛

子共結來緣以此思之誠是佛法有緣之地也默許行
焉所言長屋者則相國也真乃慕比丘思託等一十四
人買舟自廣陵賣經律法離岸乃天寶二載六月也至
越州浦止署風山真夜夢甚靈異纔出洋遇惡風濤舟
人顧其垂沒有投棄櫟香木者聞空中聲云勿投棄時
見舳艫各有神將介甲操仗焉尋時風定俄漂入蛇海
其蛇長三丈餘色若錦文後入魚海魚長尺餘飛滿空
中次一洋純見飛鳥集於舟背壓之幾沒泊出鳥海乏

水俄泊一島池且泓澄人飲甘美相次達於日本其國王歡喜迎入城大寺安止初於盧遮那殿前立壇為國王授菩薩戒次夫人王子等然後教本土有德沙門足滿十員度沙彌澄修等四百人用白四羯磨法也又有王子一品親田捨宅造寺號招提施水田一百頃自是已來長敷律藏受教者多彼國號大和尚傳戒律之始祖也以日本天平寶字七年癸卯歲五月五日無疾辭衆坐亡身不傾壞乃唐代宗廣德元年矣春秋七十七

至今其身不施苧漆國王貴人信士時將寶香塗之僧
思託著東征傳詳述焉

唐杭州天竺山靈隱寺守直傳

釋守直字堅道錢塘人也姓范氏齊信安太守璿之八
葉禮既冠衆君子器之夙有丘園之期不顧玄纁之錫
遂詣蘓州支硎寺圓大師所受具足律儀是夜眼中光
現長一丈餘持久方滅蓋得戒之驗也後抵江陵依真
公三年練行尋禮天下二百餘郡聖跡所至無不至焉

見無畏三藏為受菩薩戒聞普寂大師傳楞伽心印講
起信宗論二十餘徧南山律鈔四十徧平等一雨大小
雙機在乎圓音未嘗少異乃立願誦華嚴經還於中宵
夢神人施珠一顆及覺惘惘然如珠在握是歲入五臺
山轉華嚴經二百徧追夙心也宏覽大藏經三過廣正
見也至開元二十六年有制舉高行道俗請正名隸大
林寺後移籍天竺住靈隱峰時大厯二年也至五年三
月寓于龍興淨土院謂左右曰夫至人乘如而來乘如

而去示其心然也而愚夫欲以長繩繫彼白日安可得乎吾景落桑榆宣淹久也以其年此月二十九日告終春秋七十一僧臘四十五其間臨壇度人多矣顯名者洞庭辯秀湖州皎然惠普道莊會稽清江清源杭州擇隣神偃常州道進晝公著塔銘云

唐洪州大明寺嚴峻傳

釋嚴峻姓樊氏濰州人也父任硤州長史昭王府司馬峻性夷然學習明利年及十九應進士舉條羅茶蓼

思報劬勞投南陽佛寺後抵荊州玉泉山蘭若遇真禪
師示其禪觀入城泊大雲寺峻秉持戒印用之不利憑
附浮囊渡之攸往衆請臨壇復舉律之宗主僂俛承命
忽逢觀淨禪師頓明心法大厯元年思往清涼山未達
廬陵見顏魯公一言相契膠漆如也二年春宜春太守
俾僧正馳疏請召四年春洪州刺史李華員外延入大
明寺住止三月中俄命沐浴換衣舉望空虛合掌而逝
春秋五十九遷塔弟子圓約等於寺前大泉池立碑存

焉

唐會稽開元寺曇一傳

釋曇一姓張氏葢韓人也其先軒轅賦姓至良佐漢侯于留魏晉已還衣冠繼代曾祖恒隋太常卿扈蹕揚都遂家於越恒生孝廉翼翼生處士藏藏生一令聞江南今四葉矣一宿植淨因生知慧性弱而敏悟長而聰明年十五從李滔先生習詩禮終日不違十六聽雲門寺茂亮法師經論一聞懸解法師異之謂其母孟氏曰此

佛子也可令削髮當與授記亮即孝和皇帝菩薩戒師也一聞而歡喜有度世之志景龍中承恩出家隸在僧錄年滿受具於丹陽玄昶律師學通事鈔於當陽曇勝律師既而鑽木見煙窺牆覩奧開元五年西遊長安依觀音寺大亮律師傳毘尼藏宗聖寺檀子法師學唯識俱舍等論安國寺印度沙門受菩薩戒於是蓮華不染之義甘露甚深之旨一傳慧炬了作梵雄遠近瞻仰如宗師矣然刃有餘地時兼外學常問周易於左常侍褚

無量論史記於國子司業馬貞遂漁獵百氏囊括六籍
增廣聞見自是儒家調御人天皆因佛事公卿嚮慕京
師籍甚時丞相燕國公張說廣平宋璟尚書蘓瓌充國
陸象先秘書監賀知章宣州涇縣令萬齊融皆以同聲
並為師友雖支許之會虛嘉宗雷之集廬岳未云多也
四分律者後秦三藏法師梵僧佛陀耶舍傳誦中華與
羅什法師共為翻譯今之講授自此員來魏法聰律師
始為演說聰授道覆覆授光洎隋朝相部勵律師作疏

十卷西京崇福寺滿意律師盛傳此疏付授亮律師其所傳授一一依勵律師疏及唐初終南宣律師四分律鈔三卷詳畧同異自著發正義記十卷明兩宗之踳駁發五部之鈐鍵後學開悟夜行得燭前疑泮釋陽和解冰佛日照晰而再中法棟崢嶸以高峙發正記中斥破南山持犯中可見也二十五年仗錫東歸明年詔置開元寺長史張楚舉為寺主因而居焉一聲振京華道高吳會布大慈以攝衆修萬行以表儀順風問道者數擊

肩摩函丈請益者波委雲萃虛受之量隨而演說故前
後講四分律三十五徧刪補鈔二十餘徧焉江淮釋子
受木又者非一登壇即不為得法從持僧律益度人十
萬計矣至德之際國步多艱緇徒慢法罕率經教國相
王公出鎮於越以一德名素高請為僧統一變清淨大
闡熏修決旬之間迴邪入正善誘潛化皆此類焉始者
一入關謁明達法師目之曰汝人中師子也又遇遵善
寺尼慈和歌曰曇一師解毘尼大聰明更無疑為達人

之所諺多矣天寶十四載淞河潮水南激錢塘大雲伽
藍當茲湍淦因請一講律學徒千人咸發大願每上念
摩訶般若乃止濤激以福伍胥龍王用茲莊嚴祈於衛
護五月晦夜惚恍之間見一神人衣冠甚偉稽首謝曰
蒙垂法施即改波流未逾九十日漲沙五十里道俗驚
歎得未曾有一蔚為法主大揚教跡發明前佛之付囑
保證後佛之護念四句作偈受持者了於未了一音演
法諦聽者聞所不聞非夫天地淳精江山粹靈與法作

程間世而生孰能玄通密證如此其大者乎寺中洪鐘一所作也遠徵鳬氏近法雷門生存累年匠其規制歿後三日成於鎔造聲應百里扛乎萬鈞蒲牢呌而地震師子吼而山葉警悟聳俗導引迷方胡可言也法謝形離薪盡火滅以大厯六年十一月十七日遷化於寺之律院報齡八十僧臘六十一即以明年十一月二十四日遷座於秦望山從先和尚之塋也一春秋已高精爽逾勵既不衰憊初無疾苦忽謂侍者曰吾將掃禮墳塔

歸骨於此數日之後奄然而終江淮之南河洛之表衣
縗制服執紼送喪號哭滿山旛華蔽野比夫劇孟之母
送車千乘孔子之墓栽樹萬株可同年哉門人越州妙
喜寺常照建法寺清源湖州龍興寺神玩宣州隱靜寺
道昂杭州龍興寺義賓台州國清寺湛然蘓州開元寺
辯秀潤州棲霞寺昭亮常州龍興寺法俊等早發童蒙
咸承訓誘三千弟子仰梁木而增悲八萬門人望梅檀
而不及時會稽徐公浩素敦鄉里之舊為碑頌德焉大

歷十一年也

宋高僧傳卷十四

欽定四庫全書

宋高僧傳卷十五

宋 釋贊寧 撰

明律篇第四之二

正傳十九人
附見三人

唐餘杭宜豐寺靈一傳

釋靈一姓吳氏廣陵人也神清氣和方寸地虛與大和元精合其純粹年肇九歲僻嫌朽宅決入梵園墮息慈之倫稟出家之制暨乎始冠受其具足學習無倦律儀

是修示見談笑欲明解脫示人文藝以誘世智初不計
身中有我我中有身德全道成緣斷形謝以寶應元年
冬十月十六日寂滅於杭州龍興寺春秋三十五凡滿
十五安居臨終顧謂弟子行茶毘法樹小浮圖焉時左
衛兵叅軍李紆嘉興縣令李湯左金吾衛兵曹叅軍獨
孤及相與悼梁木之既壞慮陵谷之當遷後之人禮應
真之塔婆昧應真之德行故刻石於武林山東峰之陽
也一家富貨殖既而削髮推千金之產悉讓諸孤昆弟

所取者惟納衣錫杖自爾叩維揚法慎師學相部律造
乎微而臻乎極友善者慧凝明幽靈祐會稽曇一晉陵
義宣同門三益作者七人也一咳唾塵境繼日經行宴
坐必擇山椒樹下初舍于會稽山南懸溜寺接禪者隱
空乾靖討論第一義諦或遊慶雲寺復居餘杭宜豐寺
寺隣生丹山門對佳境罔然獨往暴風偃山正智不動
巨浪沃日浮囊不飄於是著法性論以究真諦此一之
了語也每禪誦之隙輒賦詩歌事思入無間興含飛動

潘阮之遺韻江謝之闕文必能綴之無愧古人循循善
誘門弟子受教若良田之納膏雨焉一跡不入族姓之
門與天台道士潘志清襄陽朱放南陽張繼安定皇甫
曾范陽張南史吳郡陸迅東海徐嶷景陵陸鴻漸為塵
外之友講德味道朗詠終日其終篇必博之以文約之
以修量其根之上下而授之藥焉一居寺高隅初無井
泉一旦呀然而涌噴金砂之溜於庭之左右挹之彌清
斟之無竭蓋精至之感矣詩行於世有選其尤者入間

氣集焉

唐吳郡東虎丘寺齊翰傳

釋齊翰字等至吳興沈氏之子高祖陳國子祭酒曾祖
隋魏州司馬祖考三世不仕翰綺歲從父至山寺蹈高
靜無塵之躅惻然有宿命之知固請捨家至天寶八載
八月五日奉制度配名永定寺九載十月躋五分壇納
形俱戒移名開元大厯中轉隸武丘皆兩州道俗所請
從命也翰道性淵默外則淡然迹不近名身不關事長

在一室寂如無人豈比夫駢行鼓簧之士哉顯門相部
義疏精敏罕儔明法華經主蘓湖戒壇每當請首則今
時所謂壇長也大厯十年入流水念佛道場是夜西方
念中頓現蓋純誠之所致也即以其年終於本院春秋
六十八法臘二十六翰遇疾之日謂門弟子曰有鶴從
空飛下迴翔我前爾曹見乎必謝之期小聖猶病安能
免哉受業門人如隱戒壇宣允等與吳興皎然結法門
昆弟之交俱高潔難可輕慕焉

唐潤州招隱寺朗然傳

釋朗然俗姓魏世襲冠冕其先隨東晉南渡則為南徐人也開元中入道受業於丹陽開元寺齊大師天寶初受具於杭州華嚴寺光律師後徙靈隱寺依遠律師通四分律鈔重稟越州曇一律師精研律部講訓生徒四遠響應肅宗至德二年恩命舉移祿名於慈和寺上元中刺史韋儼又請為招隱統領大德即以其年講授之暇著古今決十卷解釋四分律鈔數十萬言繁雜義例

條貫甚明大行於世觀其先列古人之義有所不安則判斷之故號決也決中自序初依天竺威律師學習復從遠一二師也凡戒壇則二十六登皆為壇席之主律鈔凡二十八過講有饋遺者隨豐薄受而轉施悲信二田凡於教理披文究義皆言宿習之力也執持戒檢斯須不違大厯十二年冬癸卯趺坐如常恬然化滅時年五十四僧臘三十五越十三年春辛酉建塔於山西原線麻之徒泣血千計高行弟子清浩擇言等請並弟子

御史中丞洪府觀察使韋儼吏部員外李華潤州刺史
韓賁湖州刺史韋損御史大夫劉暹潤州刺史樊寃皆
歸心奉信屯田員外郎柳識為碑頌焉

唐越州稱心寺大義傳

釋大義字元貞俗姓徐氏會稽蕭山人也以天授二年
五月五日特稟神異生而秀朗七歲父訓之以經典日
可誦數千言年十二請詣山陰靈隱寺求師因習內法
開卷必通人咸歎之屬中宗正位恩制度人都督胡元

禮考試經義格中第一削染配昭玄寺自茲聽習旁瞻
玄儒開元初從吳郡圓律師受具復依本州開元寺深
律師學四分律指訓義因遊長安深公已亡乃捫衣法
華寺玄儼律師其俊邁出倫儼云於今傳法非子而誰
及稱心本寺超律師請為寺任開元中喪親誓入天台
佛隴轉藏經答劬勞也天寶中遂築北塢之室即支遁
沃州之地也初夢二梵僧曰汝居此與二十日至寶應
初復夢曰本期二十日今滿矣魔賊將至不宜更處無

何海賊袁晁竊據剡邑至于丹丘義因與大禹寺迴律
師同詣左谿朗禪師所學止觀而多精達前後朝貴歸
心者相國杜鴻漸尚書薛蕙訓中丞獨孤峻洺州刺史
徐嶠次徐浩皆宗人也以大厯己未歲五月終於本院
春秋八十九僧臘六十三殯於寺之北塢舊居因造塔
焉義前後戒壇計二十七登受戒弟子三萬餘人終時
室中聞天樂聲驗乎生誦法華經大涅槃經小大乘戒
本以為口業德行非歸兜率不往淨土未可議其生處

也

唐常州興寧寺義宣傳

釋義宣者晉陵人也宿植利根脩然出俗不煩師訓砥礪厥心納法後孜孜律科時無虛度立儒旁綜長在篇章卒問捷給而稟延陵恭讓之風雅得毘尼之體初揚州法慎傳於舊章淮甸之間推為碩匠天寶初宣斂衽振衣諮詢彌久輩流率服慎且歎賞曰可畏乎宣講終南事鈔請業于周律師之庭考覈尤精乃著折中記六

卷以解之蓋懷融濟寧勝諸師有所紕謬故也使是非
各盡其分人免據宗而阿比從此立稱耳毘陵多出名
士僧有三宣慧德義是歟時於江都習業與會稽曇一
閩川懷一慶雲靈一同門為朋也晉陵既有三宣慎門
復出三一焉江表資為美談宣天寶末盛行化導罔究
其終

系曰夫名以制義所出無窮奈何師資踵武而犯教祖
之諱乎通曰春秋貴賤不嫌同號也或曰滕齊不敵俱

書侯乃曰不嫌同號號與名豈得例諸通曰號大不嫌
名小豈嫌乎矧以義宣始為名者安知弟子成事於南
山之門邪然出家者必也無妨一則姓既以華從梵咸
稱釋氏一則西域無諱此合從旃具諱者周人以事鬼
神夏商無諱明矣況乎宣師已生兜率小為天人大為
菩薩豈宜以鬼神事之致令唐初高德勝士往往止存
一字名職由諱之極矣屬今修撰乃闕文也乃知真諦
無諱俗諦聞似則懼或曰今沙門姓既為釋名復不諱

言我不隨俗諦云何對君主稱臣莫西域有否通曰姓名不對王者臣妾表疏合然昔齊帝問王儉遂令對見稱名自漢至唐肅宗朝始見稱臣由此泐而不革良以沙門德薄日就衰微一往無復矣又以法委國王誠難改作王謂爲是楷定莫移故佛言雖非我制諸方爲清淨者不得不行也

唐蘇州開元寺辯秀傳

釋辯秀俗姓劉氏漢楚王交三十一代孫也秀幼孤諸

父哀字禮如教立孝自天生而宿植緣深心田欲稔因請伯氏出家長行哀而捨旃事靈隱謀禪師便能問津圖入道之意所聞指訓如涼風入懷醒然清悟天寶四年受戒於東海鑒真大師傳律於會稽曇一至德中舉高行諱名於吳郡開元寺乾元中下詔天下二十五寺各定大德七人長講戒律秀應其數也頃年於淨土一門不愆于念嘗謂人曰昔聞西方之行是有相大乘此乃達心不直非達觀之說何邪夫出言即性發意皆如

而一色一香無非中道況我正念乎秀壇場一十六番
度人孤制律樞正持僧綱自肯湖南北皆宗仰焉以建
中元年六月十五日寢疾而終春秋六十七法臘三十
五當其逝日有庭樹一本枝葉扶疎朝華正敷而遽萎
瘁其年七月五日遷靈龕於武丘西寺松門之右門入
道亮道該清會偕遠旃檀之香樹也故觀察使韋元甫
李棲筠號州刺史李紆御史中丞李道昌盡欽慕往德
亦林下之交雲書爲碑頌焉

唐京師安國寺如淨傳

釋如淨不詳何許人也甫叅法位當納戒津明練毘尼
砥礪名節時恒講勗徒侶雲屯辭筆偕長博達儒典先
是關中行智首律師四分律疏魏郡法礪律師著疏別
行爾時關輔河北各競宗派微似參辰隋末唐初道宣
律師以首大疏爲本造刪補律鈔三卷稍爲會要行事
逗機貞觀已來三輔江淮岷蜀多傳唱之次獎三藏弟
子懷素者先習鈔宗後委棄宣礪之學於咸亨年中別

述開四分律記後號新章歟至代宗大厯中新章舊疏
互相長短十三年勅集三宗律匠重定二家隆殺時淨
推為宗主語在圓照傳至建中二年奏二疏並行淨之
力也蓋以國相元公載篤重素公宗其律教乃命淨為
新疏主作傳焉

唐漢州開照寺鑑源傳

慧觀

釋鑑源者不知何許人也素行甄明範圍律道苾芻表
率何莫由斯後講華嚴經號為勝集日供千人粥食其

倉庫中米粟纔數百斛取之不竭。公夏涉秋未嘗告匱。其冥感如此。其山寺越多徵應。有慧觀禪師見三百餘僧持蓮燈凌空而去。歷歷如流星焉。開元中崔異公寧疑其妖妄。躬自入山宿。預禁山四面各三十里火光。至第三夜有百餘支燈現。兼紅光可千尺餘。異公蹶然作禮。歎未曾有時。松間出金色手長七尺許。有二菩薩黃白金色閃爍然。復庭前栢樹上畫現一燈。其明如日。橫布玻璃山可三里。所寶珠一顆圓一丈。熠燿可愛。西

嶺山門懸大虹橋橋上梵僧老叟童子間出有二炬爛
然空中如相迎送交過之狀下有四菩薩兩兩偶立放
通身光可高六七十尺復見大松林後忽有寺額篆書
三學字又燈下垂繡帶二條東林之間夜出金山月當
于午金銀二色燈列於知鉉師墳側韋南康皋每三月
就寺設三百菩薩大齋菩薩現形捧燈僧持香燈引挹
之鑪在寺門矣白中令敏中覩瑞興立此寺大中八年
改額曰開照源律師道化與地俱靈哉弟子傳講東川

所宗也

唐吳郡雙林寺志鴻傳

釋志鴻俗姓錢氏湖州長城下若人本名儼志鴻字也少出俗于石門鄉寺則梁靜林也削染受具訖往茂苑親道恒師盛集研覈精微時曇清省躬互相切磋卒成洪緒然慙先德釋南山鈔商略不均否臧無准捕蟬忘後補袞不完囊括大慈靈囂已下四十餘師記鈔之玄勒成二十卷號搜玄錄大厯中華嚴疏主澄觀披尋乃

為序冠于首然其解判不無所長其如科節繁碎是其短也春秋一百有八歲勅署為長壽大師焉近世止行其字而已今雙林累遭兵革加以水潦碑碣失蹤閱於言行也吁其儼公氏族本生必與南山宣律師相同亦為美事矣

唐京兆安國寺乘如傳

釋乘如未詳氏族精研律部頗善講宣繩準緇徒罔不循則代宗朝翻經如預其任應左右街臨壇度人弟子

千數先是五衆身亡衣資什具悉入官庫然歷累朝曷由釐革如乃援引諸律出家比丘生隨得利死利歸僧言其來往本無物也比丘貪畜自茲而嬖者職由於此今若歸官例同籍沒前世遺事闕人舉揚今屬文明乞循律法斷其輕重大厯二年十一月二十七日勅下今後僧亡物隨入僧仍班告中書門牒天下宜依如之律匠非止訓二衆而已抑亦奮內衆之遺事立功不朽如公是乎終西明安國二寺上座有文集三卷圓照鳩聚

流布焉

唐襄州辯覺寺清江傳

釋清江會稽人也不詳氏族幼悟幻泡身拘羈鞅因入
精舍便戀空門父母沮勸建乎難拔禮曇一律主爲親
教師諷誦經法寓目俱通長者品量之曰釋門千里駒
也於浙陽天竺戒壇求法與同學清源從守直和尚下
爲弟子還聽習一公相疏并南山律鈔間歲精義入神
舉皆通暢而善篇章儒家筆語體高辭典又擅一隅之

美時少倫儼其褊燥之性不與人類嘗於一公少因不足亦有捨和尚之譏由是遊方服勤凡云律筵無不預者自責已曰天下行半少有如我本師者還會稽一公猶老當其僧大集時擊木唱某再投和尚攝受時一公詬罵江雨淚而懺悔曰前念無知後心有悟望和尚大慈施與歡喜苟不許收則越人不可以強售章甫也一公憫其數四求哀乃曰為汝舍垢遂為師資如初江有禪觀之學大厯八年於汝濱遇忠國師因弟子說自忠

曰此律師是和尚鄉人乃欣然相會尋往南陽再謁國師密傳心要焉

系曰江嘗為七夕詩或謂之四背中一背也通曰詩人興詠用意不倫慧休怨別陸機牽牛星屈原湘夫人豈為色邪皆當時寓言興類而已若然者言火則焚口說食則療飢也矣江之捨師後乃揚師之美反權合道也實為此詩警世無常引令入佛智焉其故何也詳江遇忠國師大明玄理無以域中小乘法拘之哉

唐會稽雲門寺靈澈傳

釋靈澈不知何許人也稟氣貞良執操無革而吟詠性情尤見所長居越谿雲門寺成立之歲為文之譽襲遠講貫無倦生徒戾止如闐闐焉故秘書郎嚴維劉隋州長卿前殿中侍御史皇甫曾覩面論心皆如膠固分聲唱和名散四陬澈遊吳興與杼山畫師一見為林下之遊互相擊節畫與書上包佶中丞盛標揀其警句最所重者歸湘南作則有山邊水邊待月明暫向人間借路

行如今還向山邊去唯有湖水無行路句此僧諸作皆
妙獨此一篇使老僧見欲棄筆硯伏冀中丞高鑒深量
其進諸乎其捨諸乎方今天下有故大賢勤王輒以非
急干請視聽亦昭愚老僧不達時也然澈公秉心立節
不可多得其道行空慧無慙安遠復著律宗引源二十
一卷為縑流所歸至於玄言道理應接靡滯風月之間
亦足以助君子之高興也其為同曹所重也如此晝又
賈詩附澈去見佶禮遇非輕又權德輿聞澈之譽書問

畫公迴簡極筆稱之建中貞元已來江表諺曰越之澈
洞冰雪可謂一代勝士與杭標雪畫分鼎足矣不測其
終

唐揚州慧照寺省躬傳

釋省躬睦州桐廬人也為童強識耆宿呼語怪其志大
而言高每厭樊籠忽投聖德寺慕道從師勅恩得度性
靈天發於毘尼學道如溫習復擇名師得姑蘓開元道
恒師恒曰甚矣吾得躬也門人曰並親及乎探賸精微

愈征愈遠時有擊論互指為迷者必請見躬為其判之
坐分曲直諺曰義盡省躬言到躬義無不盡也其博綜
律乘扞禦師門也若此恒曰自吾有躬也惡言不聞矣
躬避席葉拱而對曰某不佞也仰師之道若採扶桑以
啖蠹蠶所患者未能嘔繁絲以報主耳恒曰視子吐園
客五色絲可供黼黻之資言太謙矣晚赴維揚之召廣
訓徒焉然其滿口雌黃品藻臧古今之義生徒明敏
者各錄之都加潤色號順正記十卷行之復著分輕重

物儀別行訟襲十三章門條例外加近世現有物之重
輕頗為要用躬復高儒學作碑頌越多以其曾化邪溝
故呼淮南記主自號清冷山沙門焉

唐吳郡包山神皓傳

雜亮

釋神皓字恒度姓徐氏八代祖攜齊竟陵王西邸學士
子陵梁尚書左僕射其文與庾子山齊名迨陳國亡因
佐吳邑遂家姑蘓皓乃為吳郡人也天性耿潔風韻朗
邁幼負脫俗之姿尋依錢塘龍泉道場一公出家天寶

六年降版詔精擇真行一州許度三人皓居薦首因隸
僧籍于包山福願道場初進具於興大師次通律鈔於
曇一後士講律鈔五昇壇場遂乘舟歸包山使野叟誅
茅山童掃石逍遙棲息旋增修屋宇乾元元祀有詔天
下二十七寺各奏大德七人長講戒律因請住開元寺
欲果其願且懼簡書遂僂從命奉戒弟子開州刺史
陸向前給事中嚴沆服道弟子禮部侍郎劉太真前大
理評事張象欽風弟子前蘄史亞相李棲筠請綱任海

隅一邑緇伍三變至于道末年工於圓宗別置西方法
社誦法華經九十餘部貞元六年十月開元寺遇疾至
十二月顧囑弟子維亮曰我棄世後可歸洞庭故山置
塔說法而終是夜瑠璃色天星霽如雨西方兆朕密現
于前春秋七十五僧臘四十三門人維亮有文有道獨
步當時執師之喪不以證而廢教也傳法弟子道超靈
俊道濬道稜維讓維誠皆一時英邁雪晝為墳塔碑頌
美云

唐京師安國寺藏用傳

釋藏用不詳何許人也從其拔俗依棲嵩山空公為師
及乎年當應法即於汾川炬律師所受上品形俱法登
詣洛中業公講肄研覈律文循其奧妙無所不臻洎聞
有禪觀之學遂登廬陟霍涉漢泛湘望雙峰之叢林又
歸開法京輦道既精粹訓且均敷藹然為物楷模嚮風
宗重當建中中已全三十許臘尋應詔充臨壇首席相
繼度弟子越多及居東城化塔乃代宗之邸第也推用

主其綱任必芻至息慈皆遵畏愛焉席熊延客揮麈開
談指衡山石也有以識前身傳曹谿鉢也有以知後際
是以門多長者之轍室滿度人之籌益物良深坐鎮雅
俗貞元中左司正郎王銷南臺崔公繼和之如是數公
將議標題兵部正郎程浩作都序職方正郎知制誥吳
通微書之四年戊辰歲也用公長於律學急護任持為
上都之表則也

唐湖州八聖道寺真乘傳

釋真乘姓沈氏德清人也厥父玄望孝廉舉調兗州司馬母氏妊乘有神光異氣之祥識者言沈氏必大其閥閱暨誕生也瓌偉長與宗族諸子雜處若羣草中之琪樹焉總丱之後司馬以文學喻之令修官業且愀然如有不得已之色居處翫戲則以佛像班布父觀其宿習果請出家屬顏魯公許試經得度時已暗誦五百紙比令口諷一無差缺大見褒異落髮配住八聖道寺得戒後於通玄寺常進師所綜習毘尼進公見其俊邁也誠

同門曰乘雖少齡不可以伯仲齒之後西上京師雲華寺學法華天台疏義大著聲望又章信寺衆僧辟其講發醉千日者一聽而自醒迷終身者暫聞而永悟經宗律柄兼講無虧籍甚緇行烜赫京邑貞元十一年功德使梁大夫以德宗亟幸安國寺奏乘移隸以備應對充供奉大德數焉時本師無滯亦以道業實蒙恩渥奏舉乘為國祈福無滯忽夢乘捧一白蓮華南去無何乘果疾乞歸田間勅允既還鄉里本郡守李公錡田公敦浙

東率薛公戎或踵門而勸登法座或馳簡而延蒞戒壇
乘迫以法緣悉所勉強以是八為律學座主四為臨壇
正員凡訓授度人或巾屨結緣一無所受遊五臺山禮
文殊聖容所見瑞相不可勝言後在護國寺禮佛名經
一百周懺法之餘撰法華經解疏記十卷以元和十五
年冬十月示疾而終於本寺乘精于律法長於演說以
長慶二年十月十三日焚身于韶村西隅遵遺命也萬
年縣尉王甄為碑述德焉

唐杭州靈隱山道標傳

釋道標富陽人也俗姓秦氏其遠祖與羸同姓世為汧隴大族及晉東渡衣冠隨之後為杭人也其高曾至王父皆公以儒素不甘為吏故州里尊奉之標生則孤明長而深趣老而堅固蓋良善之因有自來矣年七歲時神清氣茂不雜凡童脩有大沙門手摩其頂曰此孺子目秀如青蓮得非我釋氏之威鳳乎苟能捨家必有善稱不然乘雲霓薄天漢吾不可得而知也父允其請遂

為靈隱山白雲峰海和尚弟子妙高之上唯日月是麗
娑竭之宮固雲雷斯蓄至德二年詔白衣通佛經七百
紙者命為比丘標首中其選即日得度蒙配天竺寺焉
永泰初受具品於靈光寺顓律師登以護戒嚴謹為時
所推毘奈多羅之言罔不該貫凡度人戒計六壇為衆
糾繩經一十二載置田畝歲收萬斛置無盡財與衆共
之貞元中以寺務克豐我宜宴息乃擇高爽得西嶺之
下葺茅為堂不干人事用養浩氣焉標經行之外尤練

詩章辭體古健比之潘劉當時吳興有畫會稽有靈澈
相與訓唱迭作笙簧故人諺云雪之畫能清秀越之澈
洞冰雪杭之標摩雲霄每飛章寓韻竹夕華時彼三上
人當四面之敵所以辭林樂府常采其聲詩由是右庶
子姑臧李公益書云重名之下果有斯文西還京師有
以誇耀又景陵子陸羽云夫日月雲霞為天標山川草
木為地標推能歸美為德標居閒趣寂為道標名實兩
全品藻斯當爾後聲價軼於公卿間故與之深者有相

國李公吉甫大司空嚴公綬右僕射韓公皋禮部侍郎
呂公渭滑毫節制盧公羣襄陽節制孟公簡同州刺史
李公敦鳳翔尹孫公疇浙東廉使賈公全中書舍人白
公居易隋州刺史劉公長卿戶部侍郎丘公丹外郎裴
樞秘閣嚴維小諫朱放越廉問薛戎夕拜盧元輔常州
釋元浩潤州釋南容金華釋乾輔吳門釋光嚴上都釋
智崇等並心交塵外分契林中萬境在空驅之為射御
五峰滿眼立之為疆場文雄而再鼓不衰神王而一戰

自勝者也以長慶三年示有微疾六月七日歸滅于所
居蘭若至冬十月三日葬于舊山春秋八十有四法臘
五十八弟子如玢如訢行儉省言常儉智猷曰超等皆
得師之法倣仰不遑空圍遠於梅檀恨滿盈於石室至
今杭民謂之西嶺和尚矣開成五年中鄭素卿錄德行
刊碑頌立于天竺山之東墟存焉

唐衡嶽寺曇清傳

釋曇清未詳何許人也幼持邊幅罔或迷方以謹昏叟

究窮佛旨及負笈來吳北院道恒宗師法會與省躬猶
滕薛之前後也旋留南嶽化徒適會元和中閬州龍興
寺結界時義嵩講素新疏傑出輩流因云僧祇律云齊
七樹相去爾所作羯磨者名善作羯磨準此四面皆取
六十三步等如是自然界約令作法界上僧須盡集時
清遂廣徵難如是往返經州涉省下兩街新舊章南山
三宗共定奪嵩公虧理時故相令狐楚猶為禮部外郎
判轉牒據兩街傳律斷曇清義為正天下聲唱勇執紀

綱清能干城矣後著記號顯宗焉

系曰清公南山宗崛起別峰人咸景仰與嵩悟二公遇
于必爭之地清果得雋矧夫閬苑也僻用律文三隅不
反既成圖狀學者流傳致其嵩公如填海底至大中中
玄暢公薦加褒貶貶嵩又轉沈尾閭中矣

唐京師西明寺圓照傳

利言

釋圓照姓張氏京兆藍田人也年方十歲篤願依西明
寺景雲律師雲亦一方匠手四部歸心照當應法乃受

近圓謹愿執持如懷寶器尋究經論訪問師承維摩法
華因明唯識涅槃中觀華嚴新經或深入堂皇或畧從
染指仍旁求於儒墨兼擅美於風騷律藏珠珍專探日
用後則霜壇秉法鴈序度人洎乎開元年中勅選名德
僧叅其譯務照始預焉至代宗大厯十三年承詔兩街
臨壇大德一十四人齊至安國寺定奪新舊兩疏是非
蓋以二宗俱盛兩壯必爭被擒翻利於漁人互擊定傷
於師足既頻言競多達帝聰有勅令將二本律疏定行

一家者時照等序奏云按四分律部主梵云曇無德秦言法藏自姚秦弘始五年壬寅歲罽賓三藏佛陀耶舍秦言覺明諷出梵文沙門竺佛念聽而筆受成四十五卷至十一年歲次戊申支法領又從西國將梵本來於長安中寺重讎校迨十四年辛亥譯畢沙門慧辯等筆受成六十二卷後有魏朝道覆律師於法聰講下纂成疏六卷北齊慧光律師造疏二本次道雲律師修疏九卷次道暉撰疏七卷隋朝願裁疏十卷自唐平一天下

也四方昌阜三寶增明有智首律師述疏二十一卷次
慧滿律師造疏二十卷事各一時流通絕矣當武德元
年戊寅歲有相州日光寺法礪律師製疏至九年丙戌
歲成十卷宗依成實論今稱舊疏是也洎高宗天皇大
帝咸亨元年歲在庚午有西太原寺懷素律師撰開四
分律宗記十卷宗依根本一切有部大毘婆沙俱舍等
論稱新章疏是也至我皇帝受佛付囑欽尚釋門信重
大乘遵承密教見兩疏傳授各擅顯門學者如林孰見

殊異數興諍論聖慈愍念務息其源使水乳無乖一味
和合時遣內給事李憲誠宣勅勾當京城諸寺觀功德
使鎮軍大將軍劉崇訓宣勅云四分律舊疏新疏宜令
臨壇大德如淨等於安國寺律院僉定一本流行兩街
臨壇大德一十四人俱集安國寺遣中官趙鳳詮勅尚
食局索一千二百六十人齋食并果實解齋粥一事已
上應副即於安國寺供僧慧徹如淨等十四人并一供
送充九十日齋食用茶二十五弗藤紙筆墨充大德如

淨等僉定律疏用兼問諸大德各得好在否又勅安國
寺三綱僉定律疏院一切僧俗輒不得入違者錄名奏
來云其時天長寺曇邃淨住寺崇徽西明寺道邃興泚
本寺寶意神朗智釗超儕崇福寺超證薦福寺如淨青
龍寺惟幹章信寺希照保壽寺慧徹圓照共奉表謝答
詔云師等道著依經功超自覺承雪宮之旨與為火宅
之涼颶四分律儀三乘扁鍵須歸總會永息多門一國
三公誰執其咎初機眩曜迷復孔多爰命有司俾供資

費所煩筆削竚見裁成所謝知悉其日品官楊崇一宣
勅薦福溫國兩寺三綱與淨土院檢校僧等嚴飾道場
命僧行道用五十四人起今月一日轉經禮佛六時行
道至來年二月一日散其設齋食料一事已上令所司
祇供宜各精誠問師等好在及解道場中官李憲誠宣
勅語溫國寺轉念道場四分律臨壇大德等釋門三學
以心印相傳無上菩提以戒法為根本道場畢日即宜
赴大安國寺楷定律疏十道流行至二月八日勅檢校

道場大德曇邃飛錫等道場定取十日散設齋外各賜
絹帛其十四人律師並令赴安國寺修疏程才品用各
得其宜衆推如淨慧徹同筆削潤色圓照筆受正字寶
意纂文僉定超儕筆受其宗叡已下九人證義共議篇
題云勅僉定四分律疏卷第一京城臨壇大德某等奉
詔定以此為題也照為首唱諸公和之其間厥義非長
若農夫之去草其義合理猶海客之采珠可謂名解毗
尼不看他面俄屬德宗即位改元建中其年五月疏草


畢六月望勅圓照依國子學大厯新定字樣抄寫進本
至十二月十二日送祠部進新僉定疏十卷仍乞新舊
兩疏許以並行從學者所好勅宜依照務其搜集專彼
研尋著大唐安國寺利涉法師傳十卷集景雲先天開
元天寶誥制三卷肅宗代宗制旨碑表集共二卷不空
三藏碑表集七卷隋傳法高僧信行禪師碑表集三卷
兩寺上座乘如集三卷僉定律疏一行制表集三卷般
若三藏續古今翻譯圖紀三卷大乘理趣六波羅蜜多

經音義二卷三教法王存沒年代本記三卷上卷明佛
中道下儒也翻經大德翰林待詔光宅寺利言集二卷
再修釋迦佛法王本記一卷佛現八相身利益人天成
正覺記一卷判方等道場欲受近圓沙彌懺悔滅罪辯
瑞相記一卷五部律翻譯年代傳授人記一卷莊嚴寺
佛牙寶塔記三卷無憂王寺佛骨塔記三卷傳法三學
大德碑記集十五卷建中興元貞元制旨釋門表奏記
二卷御題章信寺詩太子百寮奉和集三卷貞元續開

元釋教錄三卷照自序云伏以開元十八年歲在庚午
沙門智昇修撰釋教錄洎乎甲戌經六十五年中間三
藏翻經藏內竝無收管恐年代寢遠人疑偽經又先聖
大厯七年許編入制文猶在時帝勅宜依至今江表多
集此集中經而施用焉照於律道頗有功多肅代二朝
尤為傑立累朝應奉賜紫充臨壇兩街十望大德內供
奉檢校鴻臚少卿食封一百戶後終于別院春秋八十
二法臘五十八云

系曰刊正二宗會歸一見庶幾知有定分不橫馳求何
以諸師却請雙行不其惑歟通曰是此舉也則元載所
請帝乃曰俞究其始因乃新章也挾力輪摧相部獨存
於我專利於人亦猶紀昌俄遇飛衛併其箭術成我材
官御大輅而廢其椎輪得火生而焚其木母竊量諸德
微憤不平故奏雙行同不僉定則何異乎眼頭生目匪
成三點之伊必須聲後知音方驗一變之足因排法礪
三本生焉舊有南山四家出矣又如東漢季也減一跋

扈生四強臣初止政出一門末云賂歸四貴若然者駢
拇懸瘤雖多無用然則吾善用多矣大集經云如是諸
見不妨諸佛法界及大涅槃依之修行皆得解脫此通
方之大解也哉



宋高僧傳卷十五